



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 7



BPL kübok alir nem ang angati
COVID treatment agütsütsü

PM-i Chittaranjan National Cancer
Institute campus semzüksü

VOL. XIX NO. 85 (ADOK 85) DIMAPUR KÜPTOKNÜ (SATURDAY) AENJETI (JANUARY) 08, 2022 ₹ 5.00

DMR o CMU arrtsü aser Shamator district atema senden amen

Dimapur, January 7, 2022 (TYO): Nagaland sorkari Hokolbarnü Dimapur aser Chumukedima district ana tsüingda arrtsü aser Shamator district akümtsü takhangba onüktem atema olemtepogo.

Nagaland chief minister Neiphiu Rio lenisüba kübok Chumukedima police complex nung tanü senden amen.

December 18, 2021 nü Nagaland nung district asem akümba sülen ashishitep ken o tem adok, talisa Dimapur aser Chumukedima district ana tsüingda arrtsü nung mangatetep adoka lir.

"Sorkari Dimapur aser Chumukedima tsüingda arrtsü ladangtsü atema luden ka tentettsü aser parnoki ita ka tsüingda osang agütsütsü. Tang atemabo temelenshi kecha malitsü" ta Deputy Chief minister Y Patton-i ashi.

Shamator district akümtsü akhangba atema "a third party"

ka tentettsü aser parnoki civil society den jembitsü saka state sorkari iba telok ano meshim lir, ta Y Patton-isa ashi.

Nagaland nung Yimkhiung Tribal Council (YTC)-i Shamator district akümtsü atema lungkak aitba tuluba agia arur.

COVID-19 INYAKYIM AKANGSHITSÜ:

"Chumukedima police complex nung senden amendang state sorkari lokti sentong atema telatetba kar agütsütsü lemetetogo" ta Principal Secretary (Home), Abhijit Sinha-i ashi.

Nagaland nung night curfew, mask enokba aser Covid-19 vaccine agitsü inyakyimtem akangshitsü, ta pai metetdaksü.

Linük nung aser talisa north east state tem nung Covid-19 kanga putetba aziüoktsü atema sorkari teletetbatem agiogo. Iba dak sendakba SOP ka yakta metetdaksütsü, ta Abhijit Sinha-isa metetdaksü.

State 17 nem Rs 9,871 crore PDRD Grant agütsü

New Delhi, January 7, 2022 (Agencies): Union finance ministry-i Brihostibarnü state 17 nem Rs 9,871 crore tashi revenue deficit grant agütsüogo.

Nagaland-ia Rs 379.75 lenzüokogo aser iba ya financial year 2021-22 atema PDRD Grant indang 10th monthly installment lir.

Nagaland state-i tan financial year nung April nungi January tashi nung PDRD Grant Rs 3797.50 crore tashi agizükogo.

"Department of Expenditure-i tanü state 17 nem Rs 9,871 indang itashi Post Devolution Revenue Deficit (PDRD) grant agütsüogo. Iba ya state tem nem PDRD grant instalment 10 buba agütsü" ta ministry-i ashi.

Iba grant annugba state temji

Andhra Pradesh, Assam, Haryana, Himachal Pradesh, Karnataka, Kerala, Manipur, Meghalaya, Mizoram, Nagaland, Punjab, Rajasthan, Sikkim, Tamil Nadu, Tripura, Uttarakhand aser West Bengal lir.

15th Finance Commission-i 2021-22 tsüingda state 17 nem iba grant agütsütsü ashi.

"15th Finance Commission-i financial year 2021-22 nung state 17 nem Rs 1,18,452 crore indang PDRD grant agütsütsü shiogo. Iba nungi Rs 98,710 crore (83.33%) agütsüogo" ta Union finance ministry-isa metetdaksü.

Tan ita atema state balala nem Post Devolution Revenue Deficit Grant agütsüba aser 2020-21 nung agütsüba osang:

(Rs. In crore)

S.No.	Name of State	Amount released on 10 th March 2021 (12 th instalment)	Total amount released in 2020-21
1	Andhra Pradesh	491.34	5896.92
2	Assam	631.48	7578.90
3	Himachal Pradesh	952.43	11430.85
4	Kerala	1276.72	15322.80
5	Manipur	235.30	2823.97
6	Meghalaya	40.91	490.99
7	Mizoram	118.48	1421.98
8	Nagaland	326.36	3916.94
9	Punjab	638.15	7658.90
10	Sikkim	37.33	448.00
11	Tamil Nadu	335.36	4024.94
12	Tripura	269.62	3235.95
13	Uttarakhand	422.93	5075.93
14	West Bengal	417.68	5012.93
	Total	6194.09	74340.00

Naga Club indang Foundation Day among



Kohima, January 7, 2022 (TYO): Naga Club nung mezüingbuba tir asür Rheichalie Pienyü'er semchir Prasielie Pienyü kidang Hokolbarnü Naga Club indang foundation day mongogo.

Iba sentong nung Peace activist Niketu Iralu-i onük jembidang Naga nung ya lokti ka aser linük ka kumogo ta ashi.

British yimsüsüba aser India sorkar kübok Naga nungeri rarayonga aruba nung iba ya asenoki tulutiba ajangzüktetba asütsü. Naga nung jenjang magientettsü aser India nungeri tanü Naga nung jenjang angateter alitsü, ta Niketu Iralu-i ashi.

"Naga nung lemsar alitsüsa akümba maparen den dena Naga nungeri inyakyim aika tajungba akümtsüla. Naga Club-i maneni

Naga nung aser India nung angatetdaksütsü atema milendong amer anitsü ayongzüker" ta paisa ashi.

"Tang tashi nung Naga nungeri rarayonga aruba nung ajangzüktetba ya tsürabur aser obou-otsü nungeri bendanga agüja inyakba ajanga lir. Asenoki Naga nungeri rarayonga aruba mangatetra iba ajanga asenok samatsü" ta Iralu-isa metetdaksü.

"1917 küm Europe-i aoba aser World War 1 (1914-18) sülen meyipa aruba Naga Labor Corp ajanga Naga Club tentet ta nisung aikati bilemer saka ibaji shitak masü. Oboula Rheichalie Pienyü (Peshkar, DC Office)-i ashiba agi Naga Club ya January 7, 1918 nü tentet" ta Prasielie Pienyü-i ashi.

Kohima DC office nung itasen agia mapa inyakterem (Peshkar, Interpreter, Clerks, Potdar, Chaprasis, etc) temi Naga nung atema inyaksü tangatetba nung Naga Club tentet, ta pai metetdaksü.

"Kübou Rheichalie Pienyü-i tongti shilem agia tentetba Naga Club kümzüksü atema Naga nungeri yaritepba atema kanga pelar. January 10, 1929 nü Simon Commission nem agütsüba nungtugu Naga Memorandum apitetba aser sign asüba nung pa dena liasü" ta paisa ashi.

"Asen oboula nungeri iba senmang tulu asenok nem agütsüogo aser asenoki alima reprangtsü atema kichiba tasen ka lapoktsü. Asenoki Simon Commission dangi züluba memorandum reprangdangra asenoki asen oboula nung inyakyim aser democracy nung amangba ajitetet" ta Prasielie Pienyü-isa metetdaksü.

Iba sentong nung Naga Club president Kuolachalie Seyie-i tir o jemi.

"Obou Rheichalie Pienyü-i anir kulem Naga pioneer temi alizüing tulu yur küm 102 tejakdang January 7, 1918 nü Naga Club tentet" ta Kuolachalie-i ashi.

(Maneni tapak 2 nung...)

COVID-19 Nagaland: 8 dak putet & 8 taneptsü angu

Kohima, January 7, 2022 (TYO): Nagaland nung Hokolbarnü nisung 8 dak COVID-19 putet aser 8 taneptsü angu.

Tanü Dimapur nung nisung trok aser Kohima o Tuensang nung nisung kaka dak putet. Külen, Dimapur nung nisung 8 taneptsü angu.

Nisung 32,255 rongnungi 30,390 taneptsü nguogo aser ibaji taneptsü angur 94.21% lir. Nagaland nung tang nisung 81

anepaludar saka parnok 69 dakbo shirangba yimya kecha mali.

Brihostibar tashi nung arishi küm 15 nungi 18 tsüingda tanur 1,143 nem COVID-19 vaccine agütsüogo ta health department ketdangsur kati ashi.

Maneni, Brihostibar tashi nung nisung 761,210 nem COVID-19 vaccine indang dose 13,40,872 agütsüogo ta State Immunization Officer Dr Ritu Thurr-i metetdaksü.

Vaccine agirtemji frontline

workers 60,985, healthcare workers 16,005, arishi küm 45 temapur 214,308 aser arishi küm 18 nungi 44 tsüingda alir 469,912 lir, ta paisa ashi.

"Vaccine agirtem rongnungi nisung 579,662-i dose anaprong agiogo. Parnokji frontline workers 48,627, healthcare workers 13,543, arishi küm 45 ser temapur 179,541 aser arishi küm 18 nungi 44 tsüingda alir 337,951 lir" ta Dr Thurr-isa ashi.

Assam nung vaccine magirtem atema 'curfew' tenzüksü

Guwahati, January 7, 2022 (Agencies): Omicron variant ajanga Covid-19 kanga menatetba sülen Assam sorkari Hokolbarnü January 15 nungi tenokdangba kar agütsütsü osang metetdaksüogo.

"January 1 nungi Assam nung COVID-19 wara tasembuba tenzüokogo aser iba jagi sorkari COVID-19 puteter shia Omicron variant keta lir ama züngshia anepalutsü" ta Assam Chief Minister Himanta Biswa Sarma-i ashi.

January 15, 2022 nungi aonung 10:00 ako nungi anepdang 6:00 ako tashi night curfew alitsü.

Hotels, restaurants, cinema halls, government offices aser malls amala public tesemtem nung vaccine dose ana agirtem

dang melatsü. Vaccine magirtemi semdangtsüba tesemji mozü ki dang asütsü ta CM Sarma-i ashi.

"January 15 nungi Assam nung vaccine magirtem atema curfew ama mapa tenzüksü" ta pai ashi.

"Covid tetuyubatem alema inyakba putetra mall, hotel amala kiburtem dang Rs 25,000 tashi senchi achitsü. Iba tebilemstü khuret ya kiburi abentsü. Vaccine magirtem arudaksüra Rs 25,000 senchi achitsü" ta Sarma-i metetdaksü.

"Vaccine magiba sorkar mapa inyakterem office-i marudaksütsü. Parnok office-i marubaji leave ama masütsü. Mapa meinyakra itasen magütsütsü" ta paisa ashi.

"Vaccine agirtem aser mask enokertem dang motorcycle

tesülen mener senzüdaksütsü" ta Hokolbarnü Assam State Disaster Management Authority-ia metetdaksü.

"Vaccine magirtem office-i marudaksütsü aser parnoki leave lira meshitsü akok mesüra extraordinary leave agitsü akok saka iba atema itasen magütsütsü" ta ASDMA-isa ashi.

School tem class 5 tashi atema shibangtsü. Guwahati nungbo class 8 tashi shibangtsü. Class 9-12 nung azüingertem rotational basis nung class agitsü, ta parnokisa ashi.

Taoba ghonda 24 tsüingda Assam nung nisung 1167 dak Covid-19 putet. January 2 tashi nung Assam nung nisung 200 teküpok dak dang Covid-19 puteta liasü.

Aoyimti kumteter küm 75 ajungba benjongmung mungogo



Aoyimti Playground nung January 7, 2022 nü Aoyimti kumteter küm 75 ajungba benjongmung amungdang Watsü Telen, Aoyimti village ajanga sobaliba ken ka tenloktsüba mapang tangokba noksa ka yangi angur.

Dimapur, Aenjeti/January 07 (TYO): Dimapur kübok Aoyimti kumteter küm 75 ajungba benjongmung sentong January 7, 2022 anepdang 11:00 ako nungi tenzüka Aoyimti playground nung munga liasü.

Iba benjongmung sentong ya "Nükrangdong" omen nung ajemdaker meraketa mungogo.

Benjongmung sentong tenzüka Tamsu Jamir, Pastor, Aoyimti Baptist Arogo ajanga sarasadem aser Imnukluba Jamir, Chairman, Aoyimti village council ajanga tarur pela agizükba o jembia aser iba mapang pai mezümpur bilemtetsü, tatok agütsütsü aser tarutsü putu asoshi temoatsü meshia iba benjongmungti, ta telok ayongzüka liasü.

Meren Nokpu, Tir, Ao Senso Telongjem Dimapur ajanga iba sentong nung tepela o jembidang, Aoyimti ya 'asüngdang yimkong' ka lir, kechiaser iba yimti nung tashi temeteter, lenir aser taka-taiter agi sünga lir, ta ashi.

Dimapur nung Aor tem asoshi Aoyimti ya longzü

tajung ka lir, ta pai ashi.

Iba benjongmung nung Sharingain Longkumer, Speaker, NLA nem 'Ni ya shinur' shilem agüja liasü, saka pa kota masü sentong nung metentet nung pai züluba shidi nung "India nung nujiso anguba küm nungi tang tashinung alima nung G-5 linüktem rongnung asen linük lenir ka ta züngshiba mapang asen Aoyimti-a kanga renlokogo, kong kibong 30-a majung aliba yimtsüng ka nungi yimti tuluka kuma renlokogo," ta pai ash.

Yimtsüng nung kibongtem kisüng renlokba masü saka Dimapur ya district ka ama renloka aoba nunga socio-economic tsütsü shilem tajung agir, ta pai ashi.

India linük ajunga nüjiso ngur küm 75 ajungba benjongmung küm tepiyong amungba mapang Aoyimti nung alir külem senso tajungtem dang asenoki azüngtsü-zülutsü memetetba, maka-mait, school aser primary health centre peria maliba, yimten ka kübok ki-

jen maliba, lenmang makaba aser electricity maliba timtem madak takok anguba benjongti, ta pai ashi.

Iba sentong nung tongti o jembir, I. Toshitsungba Aier, IPS (Rtd.) ajanga 'Nükrangdong' onük nung ajemdaker lokti ayongzüka liasü.

Iba benjongmung sentong nung Watsü Telen, Aoyimti Village ajanga sobaliba ken ka aten aser Rev. Z. Yapang Aier-i jubilee nungo kakat meshiteta sarasademtsür sayaja liasü.

Sentong nung Bendang Lemtur, IPS (Retd.) Convener, Jubilee Planning Board ajanga molungnen o jembia aser Dreamz Unlimited ajanga saya ka agi shilem agia lokti ayongzü.

Maneni Sosangmeren, Council member ajanga aenküp o jembia aser B. Rongsen Aier ajanga sentong tembanga sarasadema liasü.

Iba sentong Chubatemjen Lemtur aser Tamsujungla Ozukum nati ania liasü aser sentong temer jubilee mong chiyonga liasü, kong lokti ajungai shilem agi.

Class VII nungi X tashi Saksham National Competition alitsü

Dimapur, Aenjeti/January 07 (TYO): Ministry of Petroleum & Natural Gas, Government of India kübok Petroleum Conservation Research Association (PCRA) ajanga Class VII nungi X tashi atema küm shia agiba Essay Writing, Painting aser Quiz nung 'Saksham National Competition' alitsü, ta Nagaland Board of School Education (NBSE) ajanga Heads of Institutions ajunga dang sangdong ka nung metetdaksü.

Essay aser Painting tetoktepba ya 'Azadi Ka Amrit Mahotsav through Green & Clean Energy' onük nung ajemdaker alitsü.

Quiz atema tasüngdangba ya

'Fuel Conservation', Environment, General Studies aser General Knowledge nung alitsü.

PCRA-i totzü wazüka ayutsü ya linük ajunga shilem ka ama kumdaksütsü asoshi inyaker. Industry, transport, aluyimba aser kidang petroleum agi yangluba osettem kumdanga amshitsü asoshi lanur nem awareness agüja bendang lima nungi totzü bener aruba ajemdaksütsü, energy wazüka ayutsü, tanaben amshitsü akokba energy amshitsü aser lipajen wazüka aser kumzüka ayutsü nükjidong nung item Essay zülutepba, Painting aser Quiz tetoktepba ya ayongzüka agir.

Iba tetoktepba ya online nung web portal www.pcracompetitions.org ajanga agitsü. School tem nungi iba tetoktepba nung shilem agitsü asoshi registration ya January 3 nungi March 2, 2022 tashi agizüktsü.

School temi iba web portal semdanga kakatshir nem osang tejangja agütsütsü.

Iba tetoktepba aser senpet indang telemsa ya Annexure A & B nung agüja lir.

Iba dak sendakba nung NBSE ajanga NBSE kübok aliba Heads of Institutions ajunga dang kakatshirtem ajungshia iba tetoktepba nung shilem agidaksütsü totuyuba agütsür, ta sangdong ajanga ashi.

NBSE ajanga metetdaksür

Dimapur, Aenjeti/January 07 (TYO): Nagaland Board of School Education (NBSE) ajanga Heads of Institution aser 'special needs' aliba candidate tem dang shirnoksa HSLC aser HSSLC 2022 Examinations agütsütsü ali, parnoki tamalen Board dang concession/exemption atema temelaba masüngdang lira application züluang, ta sangdong ka nung metetdaksü.

Application ya candidate azüngba Head of the

Institution ajanga forward asütsüla aser iba application nung tapet medical certificate adentsüla aser NBSE Management of Examination Rules kübok agüja aliba ama concession/exemption tejangja ashitsüla, ta sangdong ajanga ashi.

Application ya email ajanga hslcorder@gmail.com aser hslcorder@gmail.com dangi January 21, 2022 tashinung yoktsüla, ta kasa sangdong ajanga ashi.

NSCN/GPRN ajanga asükhu lemsatep

Dimapur, Aenjeti/January 07 (TYO): Anojungi NSCN/GPRN nungi Razou Peyu, Athisii Dehe mapang talangka shiranga arur January 5, 2022

Pa ya Shepoumaramth Region kübok Kaibi yimtsüng nungi liasü. Pa ya Naga linük tenzüka wadang nung 1996 küm tenüng zülüoka liasü.

Pa tasünü tashi anokshitsü makokba linük meimba molungsentü nung Naga lima tawu adokba ajaki jangja

metettsü aser iba tawa asüngtsü tasak asütsü, ta sangdong ajanga ashi.

Pai Naga lima asoshi anibelem mesasai tenzüka atema pa tenüng Naga nungi otsü nung teti alitsü aser mapang ajak nung pa bilemtettsü.

NSCN/GPRN ajanga Asür Athisii Dehe'er kinunger den asükhu lemsateper. Iba ama mangyim mapang Tulusang Tsüngremi par kinunger molung süngzükjang ta sarasademtsür. Pa tanüla teti tatem maka anisüngzükjang ta sarasademtsür, ta kasa sangdong ajanga ashi.

Mizoram nung tanur lakh 1.5 nem vaccine agütsütsü

Aizawl, January 7, 2022 (Agencies): Mizoram nung arishi küm 15-18 tsüngda tanur lakh 1.5 shi nem COVID-19 vaccine agütsütsü imlar, ta health minister Dr. R. Lalhangliana-i ashi.

Linük den külemi Mizoram nung January 3 nungi arishi küm 15-18 tsüngda tanur nem Covid-19 indang vaccine agütsü tenzüko.

Pei pei district nung district immunization officers-i iba mapa inyaksü ta health minister-i ashi.

Sorkari lockdown benoktsü mesüra tenokdangba agütsütsü tebilemba kecha mali ta Minister Lalhangliana-i ashi.

Paisa Covid Appropriate Behaviour aser Covid guidelines sülen anidaksü ayongzü.

January 3 nü tanur 28 nem dang vaccine agütsü ta state immunization officer Dr. Lalzawmi-i ashi.

Tang tashi nung arishi küm 15-18 tsüngda tanur 446 nem COVID-19 vaccine agütsüo, ta laisa ashi.

Yaküm January 16 nungi tenzüker tang tashi nung vaccine 13.21 lakh dose agütsüo aser January 4 tashi nung nisung lakh 7.31 nem mezüngbuba dose agütsüo ta Lalzawmi-isa ashi.

Naga Club indang...

(Tapak 1 nungi...)

"Oboula nungertemi kanga dang mapang tamajung ka nung tarutsü pututem atema telemtetbatem agi, anungji asenoki parnok tangatetba nung masetshii noktaksü" ta paisa ashi.

"Naga nungeri reshikangshiba agi Indian Constitution agizükba ajanga Naga nunger India nunger akümtsü mesüra "Naga solution" mesüra "Indo-Naga Final Political Settlement" kübok Indian Constitution agizüktsü ta ta Delhi-i bilemra, ibaji kanga tai lir" ta Naga Club president-isa metetdaksü.

"Naga nungeri rarayonga aruba atema nüma atanger kechiyong iba ya linük ka nungi balaka razüka aotsüba mesüra ozüng alema inyakba mapa ka masü. Delhi-i teti asenok ya tsükchirtem ama benshira, asenokia tsükchir ama alitsü" ta paisa shisem.

Iba sentong nung mendenji Naga Club vice president Y Vandanshan Lotha liasü, Konyak Baptist Church Pastor Kohima Mankup-i temoatsü meshia sarasadem aser Sumi Baptist Church Kohima Pastor Khekavi Yephtho-i tenüngsang agüja sarasadem.

BPL kübok alir nem ang angati COVID treatment agütsütsü



Hokolbarnü Assam Chief Minister Himanta Biswa Sarma-i osangbener den senden amendang agiba noksa angur. (Guwahati, January 7)

Guwahati, January 7, 2022

(Agencies): State sorkari Below Poverty Line (BPL) category kübok shirangertem nem ang COVID treatment agütsütsü ta Assam Chief Minister Himanta Biswa Sarma-i metetdaksü.

January 8, 2022 nungi Assam nung night curfew mapang melenshitsü ta CM Sarma-isa ashi.

Maneni, vaccine dose anaprong agirtem ang hotels, restaurants, government offices, shopping malls, multiplexes telungi idaktsütsü, ta paisa ashi.

Assam CM-isa district ajak nung class 5 tashi school tem shibangtsü tetuyuba agütsüögo.

Kamrup-Metropolitan district nungbo school ajak nung Class VIII tashi shibangtsü ta paisa ashi.

Assam nung COVID agi shirangertem atema yipden 8,700 tema lir aser item nung oxygen beds 2,633 aser ICU beds 1,000 dena lir, ta Assam CM Sarma-isa metetdaksü.

Assam nung yashi nisung 844 dak COVID-19 putet, ana asü aser nisung 132 taneptsü angu.

Tang Assam nung nisung 2,689 anepaludar aser positivity rate ji 2.37% lir.

Manipur Congress-i BJYM lennirtem anema ken o benok

Imphal, January 7, 2022

(Agencies): BJP youth wing president aser tanga party züngsemtemi ozüing alema inyakba atema Manipur Congress-i Imphal police tsüingdang ken o ka benokogo.

"Brihostibar nikongdang Bharatiya Janata Yuva Morcha (BJYM) president Barish Sharma-i anir züngsem 20-30 shi kati Imphal nung party office amak" ta MPCC general secretary Hareshwar

Goswami-i ashi. Nikongdang 5:00 ako meta parnoki süng, lung aser mejangjatetba hadirtem bener arur MPCC indang main gate amak ta MPCC president-i ashi.

BJYM züngsemtemi office gate nung aliba youth Congress aser NSUI office-bearers dak züka merenshi aser tamajung jembu, ta paisa tai tongloksü.

Parnokisa MPCC office jakdang national leaders

mesüka yanglur rondok, ta paisa shisem.

Punjab nung Prime Minister Narendra Modi indang security tsütsü timtem ajurutsüsa akümba sülen BJYM züngsemtemi Imphal nung Congress party office jakdang lungkak ait.

Iba mapang parnoki Congress president Sonia Gandhi aser general secretary Rahul Gandhi mesüka yanglur rondok.

Neil Nongkynrih den tanü asüpila sentong agitsü

Shillong, January 7, 2022

(Agencies): Shillong Chamber Choir tenzüksang Neil Nongkynrih indang mang Hokolbarnep Shillong tonga bener aruogo.

Tanep 2:30 ako meta Neil indang mangji par kinunger aser medemertemi par kidang agizük.

Brihostibar aonung 9:30 ako meta Neil Nongkynrih indang mangji Mumbai nungi Guwahati

atong. LGBTI airport nung Neil'er kinungertemi pa mang agizük aser Shillong-i bener aru.

Neil Nongkynrih den asüpila sentep sentongji Honibarnü agitsü.

Meghalaya aser Northeast nungi tongtipang nisung aika iba sentong nung adentsü imlar.

Ajaki meteta aliba concert pianist aser Shillong Chamber Choir tenzüksang Neil

Nongkynrih Bodbarnü Mumbai nung asü. Pa arishi küm 51 tain liasü.

Nongkynrih aser SCC ya yaküm November ita nungi Mumbai nung spiritual album ka yanglutsü atema mongyonga aru.

Nongkynrih ya July 9, 1970 nü aso. Pa ya taoba Meghalaya minister aser taoba Mizoram chief secretary AH Scott Lyngdoh aser Elvirial Nongkynrih na jabaso liasü.

Guwahati nung mozü shibelener 5 apu

Guwahati, January 7, 2022

(Agencies): Guwahati police-i state balala tsüingda ozüingi memelaba mozü shibelener nisung 5 tashi puogo, ta Assam Chief Minister Himanta Biswa Sarma-i tanü metetdaksü.

Joint Commissioner Partha Sarathi Mahanta lenisüba kübok Guwahati Police-i tesem balala mita ao aser idangji mozü shibeleneritem ta temolung malemertem apu, ta Chief

Minister Sarma-i ashi. JCP Partha Mahanta-i aniba special squad ajanga truck gari ka soter mita repringdang interstate drugs supply network nung züngsem ana apu. Parnoki World is Yours tablets 70,000 apu.

Police-i apuba mozü indang jenjangji international market nung Rs 1.5 crore shi lir.

Osang tejangja ka angazükba sülen Joint

Commissioner of Police (JCP) Partha Sarathi Mahanta-i anir police telok kati mapa tenzü.

Iba mapang parnoki interstate drugs supply network nung züngsem ana apu aser World is Yours tablets 70,000 apu ta police sangdong ka nung ashi.

Ano, tanga tatalokba ka nung police-isa interstate drugs dealers 3, truck gari, i20 car aser mobile phones apu.

LIST OF PARTICIPANTS SELECTED FOR STATE HANDLOOM EXPO AT URBAN HAAT, DIMAPUR. w.e.f:- 10/01/2022 to 23/01/2022.

SL.NO	NAME OF THE PARTICIPANTS	ADDRESS/ID No.
1	Rajbala Deu ri Bora, R.B Handloom	Assam
2	Kalpajyoti Bora, Dipshika Collection	Assam
3	Rewat Bora	Assam
4	Raabita Doley, Handloom Unit	Assam
5	Nirda Doley, Weaving Unit	Assam
6	Biswa Hira Bora, Handloom Unit	Assam
7	Ashini Ingjal, Handloom Unit	Assam
8	Anjana Begu, Handloom Unit	Assam
9	N. Sunita Devi	Manipur
10	M. Jugindro Singh	Manipur
11	M. Ayingbi Chanu	Manipur
12	M. Bijenti Chanu	Manipur
13	B. Chaoba Devi	Manipur
14	K. Keinahanbi Devi	Manipur
15	Soma Sarkar, Weavers Service Center	Delhi
16	Panna, Akshita Enterprise	Delhi
17	Florence Lotha, Handloom Unit	NHHDC Pro-001
18	Wapangtila Jamir, Handloom Unit	NHHDC Pro-003
19	Imsurenla, Handloom Unit	NHHDC Pro-004
20	I. Atula Jamir, Yimchalar's Collection	NHHDC pro-005
21	Susukuma, Weaving Unit	NHHDC Pro- 006
22	Imsen Merensangla Jamir	NHHDC Pro- 007
23	Saraholi Yephtho, Weaving Unit	NHHDC Pro- 012
24	Vitoli Chophi, Lokivi Group	NHHDC Pro- 014
25	Kitoka Aye, Trinity Group	NHHDC Pro- 015
26	Chipikali, Weaving Unit	NHHDC Pro- 016
27	Mongmeth, Handloom Unit	NHHDC Pro- 019
28	Tohoni, Handloom Unit	NHHDC Pro- 024
29	Satemnungla Weaving Unit, CTN	NHHDC Pro- 028
30	Aienla Jamir, Trio MPCCS	NHHDC Pro- 032
31	Tiasangla, Handloom Unit	NHHDC Pro- 033
32	Asenla Jamir, Handloom Society	NHHDC Pro- 034
33	Repabenla, Weaving Unit	NHHDC Pro- 035
34	Aiemla H Aye, Handloom Unit	NHHDC Pro- 036
35	R. Molungla Longkumer, Weaving Unit	NHHDC Pro- 038
36	Imkonglila, Faith SHG	NHHDC Pro- 040
37	K. Lithrila Sangtam, Handloom Unit	NHHDC Pro- 042
38	Bendangnungsang, Mulungdok	NHHDC Pro- 043
39	Kezutsu-u Sekhama	NHHDC Pro- 045
40	K. Kheqholi Zhimomi, Weaving Unit	NHHDC Pro- 049
41	Putosenla Pongen, Weaving Unit	NHHDC Pro- 050
42	Yumei Rupreo, Weaving Unit	NHHDC Pro- 052
43	Aghupu Yephtho, Ahoi Weaving Unit	NHHDC Pro- 053
44	Suponglemla, Handloom Unit	NHHDC Pro- 054
45	Kumzukinla Phom, Handloom Collection	NHHDC Pro- 056
46	Arentsungla Kichu, Weaving Unit	NHHDC Pro- 058
47	Merenninla, Weaving Unit	NHHDC Pro- 059
48	Kekhrietsu u Mere, Weaving Unit	NHHDC Pro- 062
49	Merennungla, Weaving Unit	NHHDC Pro- 063
50	Livi Zhimomi, Handloom Unit	NHHDC Pro- 064
51	Eyingbeni, Weaving Unit	NHHDC Pro- 066
52	Putkoka, Olaanglar, GLG	NHHDC Pro- 067
53	Abovi Sukhai, Handloom Unit	NHHDC Pro- 068
54	Ochinaro, Molemtok Society	NHHDC Pro- 071
55	Kakhuli, Aloino Unit	NHHDC Pro- 075
56	V. Kazhevi Awomi, Awolimi Unit	NHHDC Pro- 076
57	Boholi Chishi, Handloom Unit	NHHDC Pro-087
58	Anne Z Yephtho, Handloom Unit	NHHDC Pro-088
59	Anandy Lotha, Weaving Unit	NHHDC Pro- 089
60	Hutovi Ayemi, Weaving Unit	NHHDC Pro- 090

N.B:-
 1. The participants applied but not selected will be given priority in the next State Handloom Expo
 2. The selected participants are directed to report to the exhibition ground at Urban Haat, Dimapur on 10th January, 2022 at 7:00 AM
 3. The participants are directed to keep their exhibits in their respective stall under lock & key. The office shall not be held responsible in case of any losses/theft.
 4. Selected participants are informed to strictly follow COVID SOP and the scheduled time. In case of failure, appropriate action will be taken.
Sd/-
(ZAKABO V ROTOKHA) NCS
Managing Director



People's Liberation Army (PLA) aser Manipur Naga People's Front (MNPF) züngsemtem indang noksa angur. 46 Assam Rifles indang Commanding Officer convoy amakba dak sendakba nung National Investigation Agency (NIA)-i item züngsemtem anema cash reward metetdaksüögo.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 08, 2022

Nangzükba o aser mapa

S hamatore nem district magütsüba atema Yimkhiung nung jashia longkak aitba ya nangzükba o mapa kuma meinyaktsüba ajanga lir. Ashi, district akümtsü langa aliyonga, o agi menangzük asübo iba tashi yabo jashia longkak maitla ta bilemer. Nisung ya Tsüngremi Pa mesükba nung yanglu ta Laishiba ashiba ya tetezüji nisung ya alima nungbo tsüngrem lir ta angateter. Ano, nisungtem rongnunga yimten yimsüsür aser lenirtem lir, anungji kasa nisungsa aser tsüngrem amatosa asüyonga parnokjiang Tsüngrem temesükba aser parnok dakjiang tashi tuluba lir. Aji oda, Tsüngremi o agidang amang o tesangwa na lemdanga anogo yanglu aser anüng ali aser tzü nung aliba kechisarina ajak poktetdaksüba jagi o nung tashi aser ain lir ta angatetter. Ibayongjiang, alima nung nisungtem rongnung o agi peladaksür aser o agi jashidaksür. Iba amaji o agi yanglur aser o agi raksar. Iba jagi, kibong akümdanga o agi nangzükdaksür aser yimten yimsüsürtema yimten mapa tenzuka maodang o agi tenangzükba agir. Aji oda, Tsüngremi jembiba ama, nisungi jembiba o nung tashi aliba agi, nisungi nisung den o mashi tejembi aser nisungi nisung dang o mashi teshi ta tsüraburtemi sayutsüngi o nung enoka ajungshiba asenoki angashir alitsü. Ibayongji, Laishiba nung Sayutsüngira, asenok dang nangzükker meinyak dang nungibo menangzükang tajungba ta shia aliba asenoki angur. Aji shitak lir, kechiyong nangzükker meinyakbaji tiyazü aser tashiochtsüba akümer. Iba jagi nisung jashidaksür aser tiyazü jembitsü sayur aser nisungtem rongnung temulung malem tenzükdaksür. Tanü Nagaland nunga Yimkhiung (Yimchunger) nungertemi parnok nem Shamator district magütsüba agi kanga jashia anogo shia longkak aita amongba ya, tanga agi masü, Nagaland government-i parnok nem district agütsütsü nangzükker magütsüba ajanga lir. Yimkhiung nungertemi ashiba agi, yaküm küm par lima Shamator-Chessore Assembly Constituency nung by-election agiba mapang, Chief minister den kilonser tazünpur aser NDPP nung lenirtem lia Yimkhiung nungertem dang, parnoki dang NDPP candidate den tokteper mali ser adokdaksüra, Shamatore nung ADC aliba ya DC alitsüsa district kümtsütsü ta nangzük aser nangzükba o nungji tamang kateta Yimkhiung nungertemibo NDPP candidate den tetokteper mali zübazübaa adokdaksü saka government nung alirtemiang nangzükba ama meinyak. Nangzükba apibo tangar nem district tasen magütsüyonga, Shamatore jibo district kümtsütsü yimkhiung nungertemi imlaa liasü saka memeshir nem dena district agütsü dang, agütsütsü nangzuka alir nem magütsüba jagi Yimkhiung nung jashibaji tim dang jashir ta angatetter. Atangji, government-ia Shamator-ji district magütsütsü tabo shia mali saka tagütsübo agütsütsü ta tangatettep ken o kabo kilonser tazünpur senden nung lateta lir. Ajisüaka, magütsüi soita ayuba tetezüji timtem karbo alitsüa akok, aji government nung alirtemi dang meteta lir. Iba ama timtemji lira, tamsayongi menangzükang tajungba süla. Election nung nübortem dang nangzükba ken o ji asayamenüba ken o masü, aji nisungi nisung dak inyaktsü nangzükba yimten o lir, anungji inyaktsütsüla. Tanübo, district tasen ka kümtsütsüba tenangzükba o indang jembir saka election shia yimten lenirtemi Naga yimten tebilemstü tatembang kuma telemtetba agitsü nangzükker saka Naga yimten tebilemstü tuluba dang akümer, terenlok mapa inyaktsütsü nangzükker saka terenlok tasen bener arutsüabajibo yutsür tejentema meyaglushitetter. Item ajakji nangzükker meinyakba timtem takoksatem lir. Tuensang district agi district asem pezüka kuma melemsatsü dang, Tuensang distrit kübok sub division tululu pezü liasü. Item rongnung Longleng, Kiphire aser Noklak district kumogo. Item sub division asempronglaji district akümtsü langa aliba agi kumogo aser Shamatore nema agütsütsü langa lir. Iba jagi nangzük südi. Ajisüaka, tenangzükba o raksaba agi pelateptsü melen temulung yiruteper aser nungdak makaba nung nübo, mapang aser rongsen lalua nübortem longkak aita amonger. O ya tapi agi pei jeminütsü jembitsüba ola ka dangbo masü. O nung ain lir. Iba jagi meteta asenoki o jembira, o agi nübortem pelateptsüsa mapa tajung aika inyaktettsü.

OLEMSABANG

Ao Temeshi Lai BSI version 10p 0032/2018-19/20M
Edition nung temelenshitsü kar bushitetba lemsateper


Dr. Y. Imti Tzudir, Dimapur.

(Yashi adok nungi...)

Tenyartem Mapa 2:17: "...ni kü nela.." "nelaji 'N' tuluba 'Nela' ta amshitsü.
Tenyartem Mapa 2:19: Iba tekong tabensa masü. "Temalen anüng nung tesüngmangtsütem, aser teküpok ali nung temaitsütem, azü, mi aser mokozi tangula ni sayutsü" ta asütsüla.
Tenyartem Mapa 6:8 : "ayatenya" masü "sayatenya" asütsü.
Tenyartem Mapa 12:6 "...aser ta nukertemi.." ta masü, saka "...aser tanükertemi.." ta asütsüla.
Tenyartem Mapa 13:32: Iba tekong mabensa, English Bible (KJV) nungbo yamai shia lir, "And we declare unto you glad tidings, how that the promise which was made unto the fathers." ta shia lir.
Tenyartem Mapa 19:10: "Küm" masü "küm" (k.. tilaba nung amshitsü)
Tenyartem Mapa 20:10 : "shi" masü, "ashi" asütsü;
Tenyartem Mapa 25:19: "saka teküm lir" masü, "saka taküm lir" asütsü.
Tenyartem Mapa 27:34: "ka dang" masü "ka danga" asütsü
Tenyartem Mapa 21:25: Iba tekong nung temenen pezü nungi pilaa alitsü Bendanger Khristantem dangi zülü Saka Ao Laishiba nung temenen asem dang shia lir. Anungji "nükta pangta" (fornication) temeneni enoka mali. Anungji iba tekong tabensa masü.
Tenyartem Mapa 21:35: "apu jagi air atu". Yangi "air" Ojang meteni "apu jagi atu" dang English nunga lir.
Tenyartem Mapa 25:19: "saka teküm lir ta ashir teküm lir" masü "saka taküm lir ta ashir." ta asütsü.
Rom 8:37: English Bible nungbo yamai zülüa lir, "Nay, in all these things we are more than conquerors through him that loved us." (King James Version). Yamai melentsüla, "Masü item ajak nung shiba asenok meim pa ajanga asenok takokertem nungia taoba" (2004 Edition Ao Bible).
I Korint 6:18: "mebenshiba" ta masü "benshiba" ta asütsü. English Bible nung "commit" "do" ta ashia lir.
I Korint 10:13: "tatitangba: masü, "tatidangba" ta asütsü.
I Korint 11:17: "...saka tamanungba..." masü, "...tamajungba..." ta asütsüla.
I Korint 15:39: "...ango shi..." Ibai tai asütsü. English nung yamai shia lir, "All flesh is not the same flesh: but there is one kind of flesh of men, another flesh of beasts, another of fishes, and another of birds." (KJV). Ao Laishiba nung alibaji tera balala ajiteter.
aser ano "shi ango" ta-a amshir saka "ango shi" jibo tai asütsü.
I Korint 16:17: "Fortunate". Iba ozülü "Fortunatu" ta amshi nung tajungba. English nung Fortunatus ta lir.
Galatia 3:3: Iba tekong tatembang nung "tang joko shi agi temdaksür" melena "tang shi agi tabensa kümdaksür asü?" ta asünung koda? English nung "are ye now made perfect by the flesh?"
Galatia 1:18: Kefa: English Bible nungbo "Peter" ta shia lir.
Galatia 5:21: "Tenükshuba, tetepsetba, ojang ana tsüngda nung coma alitsüla.
Galatia 6:1 "matitang daksütsüsa" masü "matidangdaksütsüla". Ojang ana masü ka dang lir.
Galatia 6:6: "lem satepang" masü, "lemsatepang". Ojang ana masü ka dang asütsü.
Efesa 1:16: "meneni" masü "maneni" asütsüla.
Efesa 3:10, 11: Item tekongtem English nung aliba ama masü saka paitepa zülüa lir. English nung agüja aliba amaji tekongtemji mix-up mesüidang meyipzük tajungba asütsü.
Filipi 1 :6: "abensatsütsü" masü, "abensadaksütaü" ta melenba tajungba asütsü.
Filipi 1:14: Yangi "adian...aser ni alenba" na yongtsü nungji "aika" enoktsüla (English Bible nung, "most of the brothers" aser kar nung, "many of the brothers" ta shia lir.
Kolosi 1:16: Iba tekong nung itemi mali: "yimlibilem süshia, tongtibangtem süshia". Anungji yamai "Kechiyong kotak nung aser alima nung oset ajak, ngutetba aser mungutetba kechisa lir, chuba menden süshia, yimlitem süshia, tongtibangtem süshia, aintem süshia, pa ajanga aser pa asoshi ajak yanglu".
Kolosi 2:16: Iba tekong nung item otem mali . benjong anogo süshia, ita lanu süshia" Itemji enoktsüla.
Kolosi 2:18: "tekolak" masü "tokolak" ta "AROK OSEP" nung lir.
1 Tesalonika 2:8 "osang tajung" ta masü "osangtajung" ta asütsüla. Ibai Ojang ka dang lir.
1 Tesalonika 3:5: "tatitanger" aser "atitanger" ta masü, "tatidanger" "atidanger" ta melentsüla.
1 Timoti 6:2: "parnoki meimba amangbatem lir. Item o sayuang aser ajungshiang" ta sür külenang iba teküpoklen, "Tiyazü Tesayuba aser Atangji Rongsen" ta asütsüla.
2 Timoti 1:1: "Paul, Khrista Yisu nung aliba taküm", Iba melena, "Paul, Khrista Yisu Tenyar ka" ta tenzükba teputepba asütsü.
2 Tim. 3:9: "tamaji" masü "tamachi". Iba zülumen (spelling) Ao Osep nung lir.
2 Tim. 4:14: " Pa mapa yari Kibubai pa nem meyipa agütsü". Iba melena "Pa mapa yari Kibubai pa nem meyipa agütsütsü" ta asübjiang shitak. Kechiaser English nunga future tense nung amshia lir. Ibr 7: 9: Iba tekong tera meshitak. English Bible nungi yamai ashitsü akok, "Aser ya ashitsü akok, oda Levi, shiba ter shilem angur, paia Abraham ajanga ter shilem agütsü".
I Peter 1:13: "Yisu khrista" Yangi "khrista" (K) tuluba nung "Khrista" asütsüla.
I Peter 2:9 "chuba putir telok, temeshi kin" (putir telok" aser "temeshi kin) na yongtsü nung coma alitsüla.
I Peter 2:11: "azüabungba nung" masü "azüabungba nungi" ta asütsüla.
I Peter 2:15: "nenoki tajung inyakba agi" ta "nenok " masü "nenoki" ta asütsüla.
I Yohan 2:16: Iba tekong "Alima nung aliba ajak" ta tenzüksü. English nung "For all that is in the world"
3 Yohan 7: Iba tekong yamai meyip nung tejangjaba süla, "Kechiyong parnoki Pa tenüng (Khrista) nung Bendangertem nungi kecha magi-i dang oadok".
J. Adokba 7:11: Iba tekong mabensa, Yamai asütsüla, "Aser chuba menden, aser tamburtem aser taküm shiruru pezü ...aser tamburtem (elders)- Ibai Ao Laishiba nung enoka mali.
I Peter 12: 10: "mangali sangwali" masü "mangli sangwali" ta melentsüla.
I Peter 17:5: "Iba tekong yamai asünung koda" ...MIIM O, BABILON TULU, NÜKTAPANGTA TETSÜDI, ALIMA TESEMPATSÜTEM".. Babilon temenen tuteta ashir asünung "MIIM O" English Bible nungbo, "MYSTERY" nungi tenzuka lir.
I Peter 18:16: "Aiatai! Aiatai! Aiatai!" Ibai English Bible nungbo anaben dang shia lir, "Alas, Alas". Ao Laishiba nunga anaben dang amshitsü junger ta bilemer.
Note 1: Ao Laishiba tekong aika nung tangar oshi agi dang zülüa lir. Tatishitsü agi: topaz, diamond, beryl, oniks" jasper, sapfir, emerald, garnet, jacint, aget, amethis, etc. itemji kechi dang ajar tatsü agi tsünglanglen (foot note) nung ratettsü nung tajungba angatettsü.
Note 2: Tsünglanglen (footnote) reference agüja alibatemi aika tai lir. Itemjia taruba edition nungbo melenshir adok nungbo kanga dang ajungtsü.
Note 3: Ni tai tuteta zülüba dang nungi ano tai karbo alitsü akok, anungji tazüngertemi Laishibaji kanga junga zünger tai kar lira sayutsüla. Iba ocet ya Lai zülur (Publisher) tai pua zülur masü saka teinyakertemi reprangshir taitemji shitak melenshir Revised edition nung adoktsü teimla nung zülur Laishibaji Tsüngrem O asünung noklang nung noklang (100%) shitak asütsüla. Anungji item tai melenshi nung ajungtsü teimla nung zülur. Ano ni putetba dang nungi tali tai (mistake) kar putetra metongshir adoktsü nung ajak atema ajungtsü tongtibangsa Jungkai Adokba 22:18,19 ashiba temerenshi mangutsüsa kanga meranga aser kümdanga inyaktsü ayongzükker. Shitak sür nung ya taia ta kar yangi tuyua ali nunga itemji meyipa agir.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Ray Bentley Ministries tenzüksang, Bentley covid tashidak agi süogo



Pastor, Ray Bentley

center ka nung nisung 30 Bible Study agia liasü. Maranatha-i hopta shia ministry balala ajanga nisung 7,000 shi tenzüka aruogo, iba dak alia anogo shia radio show Maranatha Radio ajanga pai nisung meyirjang aika den Khrista osangtajung lemsatepa aruogo. Pai jembiba otem aser sayutsüngiba onük aika pa indang website nung angutsü.

Ray Bentley ya Laishiba nung shin otem junga rateta tesayuba agütsür mongin ka liasü.

Pai The Holy Land Key: Unlocking End Times Prophecy Through the Lives of God's People in Israel kaket zülua liasü.

Bentley-isa Nehemiah Fund tenzüka liasü; iba ya Ray Bentley Ministries indang outreach mission ka lir aser iba fund ajanga Khristan melungtet telok aika yarir.

Pa asüba osang angashiba sülen kaketzülur, Joel Rosenberg aser sayutsüngrir, Greg Laurie na densema aikati mangyim jashi lemsatepogo.

Küm 40 tejaklen Bentley-i Vicki den kibong aküm aser laia pa den külemi Kibuba tenzüka aruogo. Tena jabaso ana- Daniel aser Shawn na sosema lir aser semchir trok lir.

January 07, 2022: San Diego, CA nung aliba Maranatha Arogo tenzükerem rongnung ka aser Pastor, Ray Bentley January 4, 2022 nü alima nungi pilaogo; pa coronavirus tashidak agi shiranga liasü, ta Arogoi sangdong ka ajanga metetdaksü.

Arogoi sangdong ka ajanga, "Tanü nikongdang aseni meima aliba pastor Ray Kibuba den alitsü atema ogo, ta onoki tejashi nung sangdonger. Pa coronavirus tashidak agi

shiranga liasü. Onok aoksar aser temelung raksar. Ajisüaka pa kodak nung Yisu den lir ta amanga onok melung süngzüker. 'Nai junga inyakogo kü tenzüker tajung' ta shia pa kodak nung agizüker asütsü ta onoki amanger. Yimlibilema Vicki (pa kinüngtsü), par kibong aser ozü Arogo atema sarasademjang," ta mepishia metetdaksü.

Pastor Bentley-i 1984 küm August ita nung Maranatha Arogo tenzüka liasü. Iba mapang nunggi pai recreation

Sark Methodist Arogo nung kasa tetsür/tebur kibong akümba melatsü

January 07, 2022: Joko tang nungi Sark Methodist Arogo nung Tenla kidang kasa tetsür o tetsür na aser tebur o tebur na kibong akümtsü melatsü, ajisüaka Guernsey nung Methodist Arogo karibo tang tashi telemtetba magi.

Sark Methodist Arogo nung Rev. David Stolton-i iba telemtetba pelaa agizükogo.

Rev. Stolton-i, 2021 küm June ita nung Methodist Church Conference-i Arogo nung tetsür o tetsür na aser tebur o tebur na kibong akümtsü melatsü atema telemtetba agia liasü, ta metetdaksü.

Iba conference nung tetsür o tetsür na aser tebur o tebur na kibong akümba kulizüing agütsütsü atema telemtetba agitsü asoshi nija Arogo nung tashi agüja liasü, ta paisa metetdaksü.

Guernsey Methodist Church Circuit nung superintendent minister, Howard Stringer-i, ibayongji Guernsey nung Methodist Arogo karibo kasa tetsür o tetsür na aser tebur o tebur na kibong akümtsü melatsü atema telemtetba agiogo, ta metetdaksü.

Tetsür o tetsür na aser tebur o tebur na kibong künnerteri Greffe ajanga methodist Arogo den metetpelatsü akok, ta paisa

metetdaksü. Ajisüaka item ama kiyimba kulizüing agitsütsü atema Arogoi pastor tem mekangshi, ta paisa metetdaksü.

Yaküm June ita nung UK nung tetsür o tetsür na mesüra tebur o tebur na kibong akümtsü atema Methodist Arogo-i temelaba agüja liasü. Methodist Conference nung 'kibong akümba teratet' melenshitsü atema vote agütsütep aser kasa tetsür o tetsür na, aser tebur o tebur na kibong akümtsü melatsü atema vote 254 agütsü aser ibaji anema agütsüba vote bo 46 dang liasü.

Church of England mesüra Roman Catholic Church natibo kasa tetsür o tetsür na/tebur o tebur na kibong akümtsü memelar, ajisüaka Scottish Episcopal Church aser United Reformed Church na nungbo ibaji melar.

Methodist Arogo ya UK nung Christian denomination tulutem rongnung jenjang pezübuba nung lir. Methodist Arogo 4,000 dak tema nung züngsem 164,000 shi lir.

2019 küm Methodist Conference nung iba onük agizükba sülen o lemteptsü atema local synods dangi yoka liasü. Local synods 30-i kibong akümba teratet melenshitsü

atema vote agütsü aser synod kati dang iba anemaji vote agüja liasü.

2020 conference nung 'kibong akümba teratet' melenshitsü atema vote agütsüteptsü sentong liasü saka coronavirus wara aliba agi iba kümji conference thinena liasü.

Bangladesh nung lisopur Khristanem tetsübu nung lidar

January 07, 2022: Bangladesh nung Muslim nungertemi Muslim nungertemi amakdang yirur Khristan arrshi küm 40, Biplob Tudu-i, January 3 nü pa market nungi kidangi meyipa aruba mapang nung pa dak azük, ta metetdaksü.

Tesüiba hopta ka tsüingda Rajshahi district kübok Badhair yimdak Muslim nungertemi Khristan 10 dak azük aser parnok rongnung anabo tang tashi hospital nung mongdar.

Iba yimdak lisopur 200 dak tema lir aser parnok timbaka Khristanem lir. Tangbo parnok kidang nungi ayazüka aotsüa tsübur. Tetsübu agi tainten market-ia mouteter aser tanurtema school-i meyoker.

Akhidang nungi Khristan kibong 23 shi ali square metre 12,500 shi nung lia aru, ajisüaka tawa Muslim

ANOGO ABEN TSÜNGREM DEN

Anogoji tanü asütsü akok

Idanggi asenok taküm alir, anünga alirtem, anüng nung Kibuba den ajuruteptsü parnok den külemi mepet nung ayipa atutsü. Aser yamaji asenok teti Kibuba den alitsü. 1 Tesalonika 4:17

Pauli arogo ayipa atuba indang jembir. Yisu alimai alutsü (t.16), aser pa pur anitentsü, Pa aruogo. Khrista nung asür tama shia arutsü, parnok tanela Kibuba den lir, parnok shia aruba temang tasen Kibuba den lungjemtsü. Aser shirnok taküm alir parnok den külemi Kibuba den mepet nung ajuruteptsü asoshi ayipa atutsü. Ibaji Yisui Yohan 14:1-3 nung ashibaji lir, "Nenok pei dangi agizüktsü asoshi Ni tanaben arutsü." Ibai küm tenet rishikangshir külen Yisu obendangtsüi aruba den maitetptsüla. Laishir aikati ayipa atubaji timtem masü dang ataloktsü ta ratettsür, aser küm tenet timtem rishikangshi matalokdang Khristai Pa nübur, arogo alima nungi agiener atatsü aser Pa O bendangba arutsü.

Rishikangshi nung amangba mesüra rishikangshiba sülen amangba mesüra rishikangshi teyalung nung amangbaji tongtipang tebilemstü masü. Tamanger shiai bilemstüsbaji, "Teti tatem maka mapang ni kong intoktsü?" Ibai tongtipang tebilemstü lir. Yisu kodang arutsü shingaia memetet. Ibai küm 500 sülen mesüra minute 5 tsüingda arutsü shingaia ashitsü makok. Shirnoki Yisuiji Kibur ta amanger (Rom 10:9,10) parnok teti tatem maka Yisu den alitsü, shirnoki Pa magizüker teti tatem maka molumi nung alitsü. na renema lir ma? Mapangji tang asütsü akok.

Kibuba, ni kü taküm na asüing arutsü ama alitsü, kechiaser arutsüa kar.

nungertemi Khristanem aridoker iba liji aginer.

Muslim nungertemi Tanore Police Station nung officer in charge, Rakibul arrshi küm 40, Biplob Tudu-i, Hasan-i, tang tashi nungbo Huda anema ken o benoka mali, ta metetdaksü.

Seventh-day Adventist Arogo nung züngsem, Tudu-i, "Muslim nungertemi teri ni gari nungi atsüzük aser insang amshia kü dak azükba agi teret aika sükdang," ta metetdaksü.

Paisa, "Küm 30 tejaklen ni non-judicial stamp paper ka nung sign süa iba li alizüka liasü, ajisüaka lisopurtemi aika arua iba li nung alir," ta metetdaksü.

Khristanemibo, Durul Huda aser par adianutemi Khristanem amak, ta ashi saka Huda-ibo Khristan dak azükba nunggi pai shilem agi mali, saka ali jibo pa meyong ta ashi.

OLONG PAITEP # 6043

Grid for OLONG PAITEP # 6043 with numbers 1-16 and shaded cells.

TIPILEN

- 1. O jembitsü tashi - 8
5. Súngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6042 TELANGZÜBA

TIPILEN :

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kloktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi, 16. Sür.



Sobangba o Alokba na COVID-19 agi asuba indang jembiteper

Sobangba : Hai temba...Oda tangar den jembitsüla o masu ako...Saka anabo tajung tamajung ajak jembir-ji...Yakum tashibo CORONA tashitak agi asurtem ya anogo shia nisung aikasa asüba osang agutsü...Saka tawa tanubo tasurtem dang nungi taneptsü angur-ang teimba.

Alokba : Waammaaa...!!! Aji kechi tesungmangtsü ali akaaa...??? Jokor-la tashitakji koka aor asutsü adi....Nisung ajaki ajem agiba yagi tashitakji koka aor sulabaaa.

Sobangba : Ayyeee...Oda onok yimdaklir mashi-malu tesa o-lulu tapu-tapu jembirji... Yakum tashi tasur aika sayu nungang center nungi senotsü aika angutsü asuba agi tasuba aika sayu... Saka tangbo tasur shia nem sen merijang tenem tashi agutsütsü asuba agi tasur-ji ajema sayur asu-ja tasa jembir aja...Saka ana jembir dang ako tangar dangbo teshima nooo.

Alokba : Eeeesssh....Tamba tama-kitsü o tejembi...Item nisung jagi CORONA tashitak ya tiyazü Anungji 'Mask' ya-a magitsüla...Tapu-tapu 'SOP' asuba ya-a kecha mebenshitsuäla tasa ashitsü...lbaji khenyongi mangatsüla ako...Asenok züba-züba aliba agi tashitak ya tali-tali dang puteta odar-kodi....Ano Lockdown tenzüksü osang angashir ako.

~ Lilir : L. Kika Pongener.

TANÜBO NAI LANGZÜANG

Q. Garampani sanctuary kong lir?

- A. Junagarh, Gujarat B. Diphu, Assam
C. Kohima, Nagaland D. Gangtok, Sikkim

(Taruba adok nung onoki langzüsü)

YASHI ADOK TELANGZÜBA : Ministry of Civil Aviation

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Luin

(v) tsükchir alu nung alidang oa alepba (kill enemy in their field)
* Oboulai tsükchir alu nung oa alepba naroküm pa semchir tenüing Luin jatsü.

Luyiper

(n) kidangi madoki alu nung mejanger (person who sleeps in the farm)
* Aluyimertem rongnung mapang kümzüksü atema luyiper aika kümogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA

Alima nung awatsng tulutiba 10

- Awatsüing Linük
1. Caspian Sea*[n 1] Kazakhstan, Russia, Turkmenistan, Azerbaijan, Iran
2. Superior Canada, United States
3. Victoria Uganda, Kenya, Tanzania
4. Huron Canada, United States
5. Michigan United States
6. Tanganyika Burundi, Tanzania, Zambia
7. Baikal Democratic Republic of the Congo, Russia
8. Great Bear Lake Canada
9. Malawi Malawi, Mozambique, Tanzania
10. Great Slave Lake Canada

SUDOKU # 6083

Sudoku grid for # 6083 with numbers 1-9.

TELANGZÜBA # 6082

Grid for TELANGZÜBA # 6082 with numbers 1-9.

OJANG LUTEP # 5629

- LOKTI :
TEMELENSHI :
ATEMA :
AJAKI :
JEMBIR :
SAKA :
PEI :
TAKÜM :
MELENSHINER :
MALI :

OJANG LUTEP TELANGZÜBA # 5628

MAPAREN KOKA NUNG SÜDIR SÜAKA TETENZÜK SHILEMJI KANGA DANG TONGTIBANG

PM-i Chittaranjan National Cancer Institute campus semzüksü



January 07, 2022 nü Ato kilonser, Narendra Modi-i New Delhi nungi video conferencing ajanga Kolkata nung Chittaranjan National Cancer Institute (CNCI) indang tanabuba campus semzüksüba sentong nung jembidang tangokba noksa nung angur. Kasa noksa nung West Bengal Chief Minister, Mamata Banerjee-a angur.

New Delhi, January 07

(Agencies): Hokolbarnü Ato kilonser, Narendra Modi-i New Delhi nungi video conferencing ajanga Kolkata nung Chittaranjan National Cancer Institute (CNCI) indang tanabuba campus semzüksüsügo; iba sentong nung TMC tongti aser West Bengal Chief Minister, Mamata Banerjee-a densema liasü.

Prime Minister's Office-i sangdong ka ajanga, "Ato kilonser-i linük tesem ajungalen health facilities tajungba küma yanglutsü nükjidong ayuba dak sendakba nung CNCI indang tanabuba campus ya yangluogo. CNCI nung cancer agi shirangertem aika yarir aser iba campus ulushitsü atema mapang talangka nungi

nügdaka liasü, anungji tanabuba campus yangluba ajanga nüngdak peritsü," ta metetdaksü.

Iba campus semzükba sentong nung jembidang Modi-i, tanü linük nung coronavirus vaccine dose crore 150 tashi agütsüba alizüing tongtetogo, ta metetdaksü.

Paisa, "India nung temsüa alir nütsüing shilem 90-ibo vaccine dose kabosa agiogo. Anogo pongu tsüingda arrshi küm 15-17 pur tanur crore 1.5 nem vaccine agütsüogo," ta metetdaksü.

"Sorkarisa temekok melenba jenjang ajemsüogo aser ibaji ajanga talisa teintet sensotem tajangzük nguogo. PM National Dialysis Programme ajanga sensaker lakh 12 angati 'dialysis'

agütsüogo," ta Ato kilonseri metetdaksü.

CNCI indang tanabuba campus ya sen crore 530 indoka yanglu. Centre sorkari sen crore 400 agütsü aser tanüingbaji West Bengal sorkari agütsü.

Iba campus nung yipten 460 lir aser comprehensive cancer centre unit ka lir, kong cancer tendangba, staging aser treatment facilities lir.

Iba campus nungsa Nuclear Medicine (PET), 3.0 Tesla MRI, 128 slice CT scanner, Radionuclide therapy unit, endoscopy suite aser brachytherapy units lir.

Iba campus ya advanced cancer research facility ama amshitsü aser talisa northeast state tem nungi cancer agi shirangertem yaritsü.

US, UK, Russia-i nuclear rara nokdangtsü bangjembra pelaa agizüker: India

New Delhi, Aenjeti/January 07 (Agencies):

United States, UK, China, Russia aser France linüktemi atomic nuclear rara nokdangtsü atema tenangzükba agibaji India-i pelaa agizüker, ta Hokolbarnü India-i metetdaksü.

UN Security Council nung permanent members pongu (P5)-i külem sangdong ka ajanga, nuclear rara nung shingiaia takok mangutsü aser kodanga nuclear rara mayongtsüla, ta shia atomic

nuclear hadirtem prokba nokdangtsü atema telemtetba agiogo, ta metetdaksü.

India Ministry of External Affairs (MEA) otongdar, Arindam Bagchi-i, nuclear aliba linük ka ama India-i 'no first use' tangatetba nung nokdaker aser nuclear maliba linüktem anema nuclear mamshitsü bangjemer, ta metetdaksü.

"Tan hopta külem sangdong ka metetdaksübaji ajanga nuclear amokmeren tebilemstü

atema inyaksüji tongtibang, ta asüba jangjar aser alima nung nuclear hadirtem mamshitsü aser ajak atema security alitsü nükjidong yur inyakba jangjar," ta paisa metetdaksü.

Osangbenertem den jembidang Bagchi-i, UN General Assembly (UNGA) nung 'Reducing Nuclear Danger' bangzüing mapang nung India-ia nuclear hadirtem mamshitsü ayongzükba liasü, ta ashi.

PM Modi nokdangtsü atema tebilemba maliasü: Samyukta Kisan Morcha

New Delhi, January 07

(Agencies): Aluyimertem union balalai tentetba Samyukta Kisan Morcha (SKM)-i, Ato kilonser Narendra Modi-i Punjab kübok Ferozepur semdangba mapang nung SKM-i longkak aita Ato kilonser nem timtem agütsütsü sentong maliasü, ta metetdaksü.

Bodhbarnü Ato kilonser, Modi lokti senden ka nung adentsü aoba mapang nung longkak aitertemi lenmang nokdangba ajanga pa amenba gari densema pa meinba garitem minute 15 shi anendena liasü, ibayongji pai iba sentong thinener meyipa ao.

Samyukta Kisan Morcha (SKM)-isa, ajisüaka SKM nung densema aliba aluyimer organisation 10-i Ato kilonseri Punjab semdangba mapang nung Uttar Pradesh kübok Lakhimpur Kheri tatalokba ken o dak sendakba nung Union Minister, Ajay Mishra aputsüla, ta takhangba agüja longkak aitsü sentong ayongzükba liasü, ta metetdaksü.

January 2 nü Punjab tesem ajaklen yimtsüngtem nung longkak aitba sentongtem agi aser January 5 nüa district aser tehsil headquarters nung longkak aita liasü, ta SKM-i metetdaksü.

"Ajisüaka Ato kilonseri semdangba mapang nung pa nokdangtsü atema sentong maliasü," ta SKM-i sangdong ka ajanga metetdaksü.

"Iba anogo nungji aluyimertem longkak aitdang police-i nokdangba ajanga parnoki lenmangtem nung mener longkak ait. Yamaji Pyarayana nunga flyover nung aluyimertemi longkak aita liasü saka aluyimertem jagi Ato kilonser convoy iba lenmang jagi arutsü ta meteti liasü. Modi meyipa aoba sülen ang media ajanga iba osang jangja," ta SKM-isa metetdaksü.

"Video noksa ajanga, iba mapang nungji longkak aiter aluyimertemi Ato kilonser indang convoy tonga maoba jangjar. Telok ka dang BJP wako amer 'Narendra Modi Zindabad' ta yimyim ayima convoy tonga aru. Anungji Ato kilonser taküm lendongi aitsüsa liasü, ta jembibaji khenyongi tiyazü," ta SKM-isa metetdaksü.

"Modi-i ayongzükba lokti senden nungji nisung aika madenshi, aser iba sentongji tamakok ka liasü. Modi-i pa taküm tera agi dang kümzük, ta jembia Punjab aser aluyimertem tenüing menüksütsü merang," ta SKM-i aitsü.

India nung nisung lakh 1 dak Covid putet; Omicron case 3,007 jungogo



January 07, 2022 nü Karad (Maharashtra) nung aliba school ka nung health worker kati arrshi küm 15-18 tsüingda tainlonglong kaketshirtem nem coronavirus vaccine tutsüba noksa nung angur.

New Delhi, January 07

(Agencies): Tesüiba ghonda 24 tsüingda India nung ano nisung 1,17,100 dak coronavirus putetogo; aser ibaji yaküm June ita nungi tang tashi nung anogo ka kija nung timtiba putetba lir, ta Hokolbarnü Union Health Ministry-i metetdaksü.

Tang India nung coronavirus agi teshirangdakpur 3,71,363 kümogo aser Omicron case 3,007 lir, ta Union health ministry-isa metetdaksü.

Omicron agi shiranger timba aliba state ji Maharashtra (876) lir aser iba sülen Delhi (465) lir.

Tesüiba anogo ka tsüingda coronavirus agi shiranger 302 süogo aser tanü tashi nung India nung iba tashidak agi shiranger ajak senteper 4,83,178 süogo.

Coronavirus agi shiranger 30,836 anepogo aser tang tashi nung iba tashidak agi shiranger

ajak senteper 3,43,71,845 anepogo.

Tang anogo shia coronavirus positive putetba shilem 7.74 kümogo aser hopta shia positive putetba shilem-a 4.54 kümogo.

Linük nung coronavirus vaccine dose crore 150 dak tema agütsüogo. Taoba Homarnü arrshi küm 15-18 tsüingdapurtem nem-a vaccine agütsü tenzükba sülen tanü tashi nung tanur crore 1.5 nem vaccine agütsüogo, ta Health Ministry-i metetdaksü.

2020 küm August 7 nü India nung coronavirus case lakh 20 ajung, September 5 nü lakh 40 ajung, October 29 nü lakh 80 ajung aser December 19 nü crore 1 junga liasü.

2021 küm May 4 nü coronavirus case crore 2 ajung aser June 23 nü crore 3 junga liasü.



January 07, 2022 nü Navi Mumbai nung BJP MLA, Manda Mhatre (abelen)-i coronavirus agi shirangertem atema Navi Mumbai Municipal Corporations (NMMC) oxygen plant semzüksüdag tangokba noksa nung angur.



US Capitol nung lendong ataloker kum ka sülen Midwest nungi nisung kati Washington nung aliba Capitol nung lendong agütsüba aija zülua bener aliba noksa nung angur. Right wing extremist temi timtem balala agütsüba ajanga pai pa tenung mashi. "Tanü iba anogo bilemtetsü asoshi ni yagi aru. Ochi angatetba nisungtemi animesor menokdakra tensa tamajungba akumtsü," ta pai ashi. Capitol nung lendong tulu ataloker Brehostibarnü kum ka ajung aser iba lendong ya ajanga America nunger democracy asoshi tebilemtsü agütsü.

Mexico state ka governor office kima gari ka nung nisung tasü mang ter ngutet

Mexico City, Aenjeti/ January 07 (Agencies): Mexico nung state ka indang governor office kimalen nisung tasü mang ter aliba SUV ka ngutetba sülen ketdangsürtemi temolung melemteti nisung ana puogo, ta ketdangsürtemi Brehostibarnü sangdong ka nung ashi. Zacatecas state indang governor David Monreal-i yimti tiyong nungi video ka ajanga ashiba agi, nisung tasü mang aliba gari ka liasü aser parnok dak züka merenshiba amai zübu keta liasü. "Parnok yangi kima

yutsütsü aru," ta state yimtiba nung kum aika tejen pa indang office, Plaze de Armas tuyua ashi, koba dang Zacatecas ta ajar. Zacatecas public security agency ajanga sangdong ka nung ashiba agi, sorkar ketdangsüri iba tesem nung temolung melemteti gari ka senzüa anguba sülen Mazda SUV gari ka ngute?. Iba gari telung nung nisung tasü mang ter liasü, ta federal security ministry ajanga ashi. Zacatecas nung teinyaktsü tulutibaji security ya lir aser pai azüdokshi ajemdaktsütsü,

ta Monreal-i ashi. "Tanem tanemi onoki mera agitsü. Onoki ajangshia aliba ya atakatem senmang ka lir," ta pai ashi. Mapang tatsüka lir Monreal-i tweet ka nung, iba dak sendakba nung temolung melemi bilemba nisung ana pua lir, ta ashi. Telok balala tsüngta raraba ajanga Zacatecas ya linük nung region tamajungtiba kumogo. 2021 kum iba region nung nisung 1,050 tepseta liasü, koba 2020 kum atalokba dang 260 agi timba liasü, ta ketdangsürtemi ashi.

Hong Kong yimten yimsüsürtem quarantine südaktsür

Hong Kong, Aenjeti/January 07 (Agencies): Hong Kong nung yimten yimsüsür aika adenba birthday party ka nung coronavirus case aliba jangjatetba sülen Hokulbarnü health ketdangsürtemi yimten yimsüsür aser ketdangsür ter dak tema quarantine asütsü totuyuba agütsü. "Iba benjong nung adener nisung ajak quarantine asütsü nüngdaker," ta Hong Kong indang Centre for Health Protection nungi Chuang Shuk-kwan ajanga ashi. Home affairs secretary Caspar Tsui ya COVID-19 tashidak keta alitsü akok ta temolung melemi alir ka den ajurutepba sülen Brehostibarnü quarantine camp-i yoka liasü. Hokulbarnü tashinung pa den ano dangar yimten yimsüsür pezü aser immigration chief Au Ka-wang liasü, parnok ajak ya birthday party ka nung adener tem alitsü. "Hong Kong nung aliba nübur ajunga dang ni tatok meshir. Iba tatalokba agi tarutsü nung ni tali saksalemstü nüngdaker ta sayur," ta Au-i sangdong ka nung ashi. Pa restaurant nung mapang tatsüka dang kazü aser par metemer den tepela lemsatepba sülen chi chiyonga memeni ao, ta pai ashi. "Ni züba-zülema ali amai bilemer aser iba atema sasar. Iba yagi tatishitsü tamajung sayur," ta ozüng yanglur Duncan Chiu-i ashi. Ketdangsürtemi lokti adenshiba atema kanga jashir, ta Hong Kong lenir Carrie Lam-ia ashi. China indang ozüng yangluba tentet temaba

indang züngsem Witman Hung asoba anogomung nung iba ya atalok ta ashir. Iba mapang benjong agitsü ya mela liaka anogo asem tejakdang health ketdangsür temi lokti tulu madenshitsu shia liasü. Tayimtsü ketdangsür ka dak Omicron variant jangjatetba sülen iba tashidak tera prokshia sorkari COVID-19 tenokdangba kar sangdonga liasü. Noksa aika nung Hung ya microphone ka amer tetsür menüa aliba ka dak apangloker aliba nguogo. Pai Brehostibarnü menur tatok meshi aser pa quarantine asütsü yokogo, ta osang ajanga ashi. Iba party nungya sorkar ketdangsüra yimti indang police tekolakba aser anti-corruption agency tekolakba densema par tuko dena liasü, saka parnok quarantine asütsü mashi, kechiaser COVID tashidak bena alitsü südi ta temolung melemteti alisang marudang parnok iba tesem yutsür orr liasü. Airline ajanga par mapa inyaker inyaksangshi ajunga memetetaka tayimtsü ketdangsüri isolation rules nung aibelenba atema par khuret asütsü, ta Lam-i hopta tetenzüklen shir liasü. Brehostibarnü osangbener temi Lam dang laia kasaji inyaktsü asü ta asüngdang dang, lar minister tem mapa asoshi lai khuret agira sorkar asoshi majung asütsü, ta lai langzüa liasü. Taoba küma Au densema immigration ketdangsür aseme social distancing ozüng nung aibelenba atema senchi chia liasü.

Kazakhstan tiri timtem agütsür khasettsü totuyuba agütsü

Almaty, Aenjeti/January 07 (Agencies): Linük tesem ajungalen sorkar anema longkak aitba azüoktsü asoshi Russia-i sepaitem yoker anogo ka lir Kazakhstan tiri par sepaitem dang pai 'bandits' aser kiralongrar ta ajartemi timtem agütsüba azüoktsü asoshi khasettsü totuyuba agütsüogo, ta pai Hokulbarnü ashi. Kazakhstan nung tongtipangtiba yimti, Almaty nung Hokulbarne sepaitemi yimti-yimtung azüoka lir amai liasü saka prangbong ola maneni angashir, kong rongrong tulu adoka nisung ter dak tema takum sama aser sorkar meyong ki-o-jen raksatsü aser mi agi rongtsür lir. "Telungpur temi parnok indang nok-o-nü meyutsü, parnoki maneni mapa tamajung inyaker mesüra mapa tamajung inyaktsü renemshir. Parnok anema tatem matong tashi raratsüla. Shirnoki temai madoker, parnok samatsütsü," ta Tir Kassym-Jomart Tokayev-i television ajanga sangdonga liasü. "Tekumdangtsü osang magütsüi khasettsü asoshi ni

ozüng amshir aser mitkar nem totuyuba agütsüogo." Central Asia nung aliba Kazakhstan linük nung nüjiso ngur kum 30 tsüngta azüdokshi aser rongrong shirong tamajungtiba tang ajurua aliba atema Tokayev-i bendangeri training agütsüba kiralongrar tenung asener. Kazakhstan-i Russian sepaitem anir arutsü atema tayimtsü 70 dak tema tanen makai yimzür aser Brehostibarnü parnoki Almaty indang airport tongtipa longkak aiter ket nungi tanaben rakzüktetogo, ta Russia indang defence ministry ajanga ashi. Totzü nung jenjang atuba asoshi telangzüba agüja longkak ait tenzükba tangbo ulushia sorkar aser taoba lenir arishi kum 81 tain Nursultan Nazarbayev anema nokdaker. Taoba mapang Soviet kübok aliba linük, Kazakhstan nung talangtiba yimsü asüba lenirji Nazarbayev ya alitsü. Pai kum asem tejakdang tir menden ya Tokayev nem agütsü saka par Nur-Sultan nung par kibongi tashi amshir ta amanger. Kazakhstan yimtiba ya pa tenung agütsür

amenokba lir. Longkak ait tenzükba sülen prangbong amer mapa tamajung inyaker nisung 26 tepsetogo, police aser national guard züngsem 18 takum samaogo, ta interior ministry ajanga ashir, saka iba osang ya Brehostibarnü nungi memelenshir. Nisung 3,700 dak tema puogo, ta state television ajanga ashi. Hokulbarne Almaty nung main square anasa prangbong ola angashi, kong tesüba anogo sepaitemi longkak aiter den khatapa liasü. Injang aser bomb agi raksatsütsü makokba gari aser sepaitem iba tesem nung adenshia aliba osangbener

temi nguogo. Iba tesem nungi metre noklang ishika pilar kanga mejungi raksar aliba civilian indang gari ka nung nisung tasü mang ka liasü. Iba yimti tesem dang ka nung injang aser bomb ayokba dokang ka kakpoka ayuar liasü. (Maneni tapak 10 nung...)

Athens anasa Piraeus port nung Epiphany benjongmung mapang tzü nung temoatsü meshiba mapang temeshi ainlen jajar temi kangki jepzüktsü merangba noksa nung angur. Omicron variant densema COVID-19 tashidak wara tali akumba ajanga Greece tesem aika nung Brehostibarnü iba Epiphany benjongmung athi mesüra kanga ajema munga liasü.



Athens anasa Piraeus port nung Epiphany benjongmung mapang tzü nung temoatsü meshiba mapang temeshi ainlen jajar temi kangki jepzüktsü merangba noksa nung angur. Omicron variant densema COVID-19 tashidak wara tali akumba ajanga Greece tesem aika nung Brehostibarnü iba Epiphany benjongmung athi mesüra kanga ajema munga liasü.

MOLUNGNEN O



07.03.1931- 22.12.2021

Asür Mrs. Meyalemla Aier (asür Imbilemba Jamir kinungtsü) mapang tatsüka shiranga alidang nungi iba lima toktsür aonü tashi, kija, kibong aser temeimertem kwinakati sarasadem, nübo, rongsen aser shisatsü agi onok nongita yariogo, nenok ajak dang pelaba lemsateper.

Tsüngremi nenok ajak moajangma ta aji ozü sarasadem.

~ Temeim kinungertem.

OFFICE OF THE KELINGMEN SENSO MUNGDAK

P.O Changtongya -798613
Mokokchung, Nagaland.

SANGDONGER

January 21st 2022 anogo aneptang 9:00 ako nungi tenzüka Kelingmen Senso Mungdak Sungküm Shibanger yim salang (Community Hall) nung akatsü, anungji Senso züngsem süngpu nungi puti tashi ajak medema arutsu sangdonger, kuli tejangja makai mungdangi marura temzüng nung aliba ama temerenshi alitsu.

NB : Agenda kar lira 18 Jan. 2022 tashi nung mendenpur ket tongjangma.

Sd/-
(Wb. P. Imsü Jamir)
President

(Wb. L. Chuba Jamir)
General Secretary

ALI AYOKER

New Showuba, Dimapur Police
Outpost sülen ali ayoktsü lir.
Contact : 8131884162

Mon DC-i metetdaksür

Dimapur, Aenjeti/January 7 (TYO): Mon DC, Thavaseelan K, IAS-i January 6 nü sangdong ka ajanga, bendanger alima penzürttem, shishilembartem, kaketshirtem, ayangertem, putirtem, tesayurtem aser shirnoksa Mon district-i aittsü atema ILP nüngdaker, parnok ajaki online nung www.ilp.nagalnd.gov.in ajanga ILP agizüktettsü ta metetdaksüogo. Iba inyakyim atema tenüngdakbatem ajak kasa web site nung angutsü, ta DC-isa metetdaksü.

Wokha DPDB senden thinener

Dimapur, Aenjeti/January 7 (TYO): Assistant Development Commissioner (Planning) & Member Secretary, DPDB Wokha, P. Nchumbemo Kikon-i sangdong ka ajanga DPDB senden January ita hopta pezübuba nung 11:00 ako nungi tenzüka DC Conference Hall nung agitsü telemtetba agiba metetdaksüogo. Senden amentsüba anogo aser onüktem anogo ishika tsüngda metetdaksütsü, ta paisa ashi. Anungji ADC (Planning) & Member Secretary-i züngsem ajak dang iba osang temulung nung ayutsü aser senden nung jangrabangra arua shilem agitsü metetdaksüogo.

78 Bn, CRPF-i civic action sentong ayonga agi



Dimapur, Aenjeti/January 7 (TYO): 78 Bn, CRPF-i January 7 nü Rusoma yimtsüng nung civic action sentong ka ayongzüka agiogo. Nüburtem aser security forces, CRPF na tsüngda tesendaktep akangshitsü nükjidong nung iba sentong ayongzüka agi.

Yimtsüng nung electricity agi kanga timtem agütsüba angateta solar street lights tem

agütsüogo, koba yimtsüng lenmang nung amenoktsü. Iba sentong nung De, DIG (OPS), CRPF, Kohima Syam Chand tongti tesemdanger liasü. Maneni sentong nung Commandant- 78 Bn, CRPF W.R. Josuah, ketdangsurtem aser 78 Bn sepaitem aser village council züngsemtem aser yimdaklirtemi shilem agia liasü.

FREE SKILL TRAINING PROGRAMME FOR WOMEN



COURSES OFFERED:

1. Make Up Artist
2. Customer Relation Management- BPO

DURATION OF THE COURSE:

3 months

All trainees will also be provided training on IT Skills, Soft Skills, Job Interview Skills and Study materials and kits.

HOW TO APPLY:

1. Application is open to any woman who is an inhabitant of Mokokchung District.
2. Send your application mentioning course preferred along with a scanned copy of Class 8th pass certificate and Aadhaar card to WhatsApp Number: 8132829367/ 9862883980/ 9975811468 or email at dlcwmkg@gmail.com with name, full address and contact number.
3. For any queries, please contact: 8132829367/ 9862883980/ 9975811468.
4. Admission will be on first-come-first basis.

ORGANISED BY

District Administration & District Level Centre for Women- Mahila Shakti Kendra (BBBP), Mkg.
In Collaboration with PMKK Mokokchung Centre.

Chendang Saddle nung Community Hall ka semzüksüogo

Dimapur, Aenjeti/January 7 (TYO): Advisor for Prisons, Printing & Stationery, H. Haiying-i January 5 nü 56 A/ C Noklakon kübok Chendang Saddle nung Community Hall ka semzüksüogo. Iba sentong nung Deputy Commissioner, Hiazu Meru aser Nokak district kübok aliba nüburtemi shilem agia liasü.

Sentong nung o jembiba mapang Advisor-i VCC

züngsem tem dang iba hall ya tajangzüük akaba sensaksemad aser yimtsüng nung terenlok atema sensaksemad tesem ka kümdaktsütsü ajunshi. Paisa, Council dang iba ki ya sen z ü sen pon gr tem ajangzükdaktsütsü atema kanga junga anepalutsü mepeshia liasü.

Community Hall semzüksüba setong ya K.

Sipong lenisüba nung agi aser E. Thongsa VCC-i lokti pela agizükba o jembia. Sentong nungsa B. Namang, M. Somba aser BJP 56 A/C Noklak Mandal tir B. Pushin nungeria o tatsütsü jembia.

Maneni Advisor-i kasa anogo EPC Mode NERSDS kübok Chendang Saddle yimtsüng nungi Noklak tashi lenmang yanglushitsü tema inyakyim tenzüka liasü.

Mahesh Babu dak Covid-19 tashidak potet



Aenjeti/January 7, 2022 (Agencies): Actor Mahesh Babu-i Brehostibarnü pa dak coronavirus tashidak potetba sangdongogo. Pa dak tashidak keta aliba temaitsü terara sayudar aser pa lokti nungi pilar par kidang temang anepaludar, ta paisa metetdaksü.

Mahesh par kibong den Dubai nung oa küm tasen benjung amungba sülen meyipa arur tanünübuba nung Covid-19 tashidak poteta liasü.

Mahesh-i Twitter ajanga, "kanga dang kümdanga liaka kü

dak Covid-19 tashidak potetogo aser tashidak keta aliba temaitsü terara sayudar. Ni lokti nungi pilar kidang temang anepaludar.

"Kü den ajuruteper alirtem ajak dang tashidak tendangtsü mepeshir. Ni vaccine magi alir ajak dang vaccine agitsü ajungshir, kechiyong vaccine agiba ajanga tashidak agi kanga mejungi kongshia mozüki aotsü nungi jenbor. Imlibilema Covid inyakyim sülen anidakang aser kümzüka liang," ta ashi.

Mapa dak sendakba nung Mahesh Babu tang taruba

Telugu film Sarkaru Vaari Paata sayatsü ataba mapang ka lir. Iba film ya Parasuram-i direct asü aser Keerthy Suresh-ia tongti shilem agir. Produce temi tawa iba film ya Sankranti benjung nungtem nung January 13 nü sayatsü ta sangdongogo.

Sarkaru Vaari Paata, koba Dubai nung timba tangoka liasü, iba film atema music SS Thaman-i mejemtsüogo. Iba film nung Mahesh Babu aser director Parasuram na tang mezüngbuba külemi shilem agiogo.

Mahesh Babu tatemsa Sarileru Neekevvaru nung shilem agiba nguogo, iba film yagi sen aika aazükogo. Iba film ya Anil Ravipudi-i direct asü aser box-office nung sen crore 200 dak tema aazüka liasü. Film nung Mahesh Babu-i sepai ka shilem agir, shiba jila tila kati aruba sülen kibong ka yimden yimsüsürtem nungi kümzüka angutsü.

Maneni pa Arjun Reddy director Sandeep Reddy Vanga den longjemer film ka yanglutsü sentong lir. 2019 küm Sandeep-i Mahesh dang otsü ka ashi koba Mahesh-i kanga sakloka liasü. Ajisüaka tenaprongla mazüngi aliba ajanga longjemer minyaktet.



Union Defence Minister Rajnath Singh-i, National Institute of Mountaineering and Allied Sports (NIMAS)-i France nung ayongzükba India asoshi mezüngbuba multi-dimensional adventure sports expedition shibangtsüba noksa nung angur. Iba expedition ya 2021 kum November ita tenzük aser Director NIMAS Colonel Sarfaraz Singh-i anir nisung 12-i shilem agia liasü.

Santosh Trophy 2022 atema fixture yangluogo

Aenjeti/January 7, 2022 (Agencies): 75buba Santosh Trophy atema Bresttibarnü New Delhi nung fixture yangluogo, kong qualifiers ajanga shimba team 10 telok ana küma lemdanger asayatsü. Iba asayamung ya February 20, 2022 nü nungi tenzük Kerala nung asayatsü renema lir.

"Hero Santosh Trophy Kerala nung asayatsüba osang angazüka ni kanga pelar, kechiyong Kerala ya football asaya meimba state ka lir," ta taoba India defender Gouramangi Singh-i ashi, shiba iba inyakyim nung teyari agüja liasü.

"AIFFF aser Kerala sorkari sentong tajung yangluogo aser

asayartemi iba asayamung nung shilem tajung agitsü imlaja atar," ta paisa ashi.

Group A ya 'Group of Death' ta ajatsü akok, kong West Bengal, Kerala aser Punjab team den Meghalaya aser Rajasthan züngoksema lir.

Group B nung champions Services pur Manipur, Karnataka, Odisha, Gujarat aser Goa densema lir.

75buba Santosh Trophy ya West Bengal (32-time winners) aser Punjab (8) na asayaa tenzüksü. Asayamung ayongba team Kerala mezüngbuba asaya Rajasthan den asayatsü shirnoki West Zone qualifiers

nung Maharashtra point ka agi ajateta liasü.

Services pur mezüngbuba asaya Manipur den asayatsü, shirnoki qualifying nung Mizoram tsükdakja liasü. Qualifier nung Karnataka team-i kanga junga asayaogo aser asayamung nung mezüngbuba asaya Odisha den asayaba mapang kasa yimya nung asayatsü imlaa atar.

Telok ana nungi temaba team ana semifinal atema qualify asütsü.

Group A: Meghalaya, Punjab, West Bengal, Rajasthan, Kerala
Group B: Gujarat, Karnataka, Odisha, Services, Manipur.

Adelaide International: Bopanna-Ramkumar na semi-i iogo

Aenjeti/January 7, 2022 (Agencies): Adelaide International 1 ATP tournament nung Hokolbarnü India nung tarep asayar Rohan Bopanna aser Ramkumar Ramanathan nati straight set nung asaya koka semifinal-i iogo.

Bopanna aser Ramkumar na tebur tarep asaya quarterfinals nung France

nung asayar Benjamin Bonzi aser Hugo Nys 6-1 6-3 agi koka liasü.

India nung tarep ya semifinal nung fourth seeded Bosnian-Mexican tarep Tomislav Brkic aser Santiago Gonzalez na den asayatsü.

Bopanna aser Ramkumar na tang mezüngbuba ATP tour nung külema asayar.

Bopanna aser Ramkumar nati maneni junga asayatetra New Delhi nung March ita Denmark den asayatsü aliba Davis Cup nung India tenüng nungi asayatsü akok.

Adelaide nung asayamung ya Australian Open atema renemshiba asayamung ka lir, koba January 17 nü Melbourne nung tenzüksü.

Kazakhstan tiri timtem...

Nütsüng yongsük million 19 aliba linük tesem ajungalen danga yimtem nunga rongrong adokba osang lir. Kazakhstan nung Bodhbarnü nungi tenzük internet shibangja lir, anungji iba linük azüdokshi tensa jungabo memeteter.

Moscow-i kanga kera sepaitem yokba ajanga taoba mapang Soviet Union kübok aliba linük nung par tashi amshitsü renema aliba sayur. Sepaitem ya Collective Security Treaty Organization kübok yoka liasü, kong Russia den taoba mapang Soviet tembar linük pungo lir. Par sepaitem ya 2,500 shi alitsü aser Kazakhstan nung anogo ishika mesüra hopta ishika alitsü, ta ashir.

Moscow-i Kazakhstan

asoshi nokdaka liasü aser tembar temi inyatsüla mapa inyaker, ta Deputy Foreign Minister Alexander Grushko-i ashi.

Russia-i anir Kazakhstan nung sepaitem yokba atema Washington-i kanga junga repringa atar, ta White House odongtar Jen Psaki-i ashi. Human rights nung aibelenba kar danga alinungbo repringa atatsü, ta ashi.

Russia nungi aruba sepaitemi raraba mesüra telungpur samatsüba maparen nung shilem agia mali, ta Tokayev indang administration ajanga ashi.

Nazarbayev-i küm aika yimsü süa aruba linük nung azüdokshi ya kangabo majurui

(Tapak 8 nungi...)

liasü. Nazarbayev ya Soviet mapang Communist Party lenir tatembangba liasü aser 2019 küm Tokayev nem tir menden agütsüba mapanga pai yimsü süa liasü.

Longkak ait tenzükba sülen Nazarbayev ya mangur aser pa nungi ola adoka mali. Tokayev-i pa jakdang inyaka alisang nungi pilatsü meranger aser longkak ait tenzükba sülen pai Nazarbayev aser par kinunger ka security post nungi anentsüogo.

Kazakhstan nung totzü jenti yanglur aser alima nung uranium timtiba adokba linük ka lir. Iba linük nung rongrong tenzükba sülen totzü aser uranium nung jenjang tali kumogo.

4th Supongmeren Memorial Volleyball Trophy akatsü

Dimapur, Aenjeti/January 07 (TYO): Mokokchung district kübok Molungkimong yimdak January 11-12, 2022 anogotem nung 4 buba Supongmeren Memorial Volleyball Trophy alitsü, ta iba asayamung ayonger ajanga sangdong ka nung ashi.

Iba asayamung nung takok balala angur nem senpet telesa yamai agütsütsü;

Champion nem senpet sen 50,000 den Trophy aser kulizüng kaket, Runners Up nem senpet sen 30,000 den Trophy

aser kulizüng kaket, tasembuba jenjang nem senpet sen 20,000 den kulizüng kaket aser pezübuba jenjang nem senpet sen 10,000.

Kija nem agütsüba sempet Best Spiker, Best Setter, Best Disciplined Team amala alitsü.

Iba asayamung nung shilem agitsü asoshi team shia entry fee sen 3000 alitsü aser registration atema P. Imti Aier, Convenor, SMVT (9383014469) aser Maki Ozukum, Secretary (7005700719) den tongteprateptsü akok.

ICC-i T20I nung temelenshi kar sangdongogo

Dubai, Aenjeti/January 7 (Agencies): ICC-i

Hokolbarnü sangdong ka ajanga, iba ita nungi tenzük T20 Internationals nung slow overrate süra innings nung tanungba over tem atema 30-yard circle tema nung asayar ka ajemtsütsü," ta kasa sangdong ajanga metetdaksü.

Asaya yimya melenshiba nung shilem ka ama ICC-isa bilateral T20 international cricket asayaba mapang asaya tom nung optional drinks interval ka agidaksütsü benokogo.

ICC Code of Conduct for Players and Player Support Personnel kübok Article 2.22 nung slow over rate atema temerenshi agütsütsü shisema aliba den asaya mapang temerenshi agütsüba ya bendenloksüogo.

"Over rate regulations ya playing conditions clause 13.8 nung shisema lir, kong fielding amenba team-i atakzükja aliba mapang nung tatembangbuba over ontettsüsa jenjang ka nung alitsüla ta shisema lir," ta ICC-i ashi.

"Parnok iba amala jenjang ka nung melira tanungba over tem nung 30-yard circle tema nung asayar ka ajemtsütsü," ta kasa sangdong ajanga metetdaksü.

Iba temelenshi ya ICC Cricket Committee-i benokba lir, shirnoki format ajak nung asaya mapang matsüzüki aotsü atema mapang shia asaya yimya asadanga arudar.

Ano tanga temelenshi kaji innings shia asaya tom nung minute ana ser tesadang drinks break ka agitsü atema bendenloko, ajisüka iba break ya agitsü atema asayamung metenzük tsüngda team ana mulungteptsü nüngdaker.

Temelenshi kübok West Indies aser Ireland na January 16 nü Sabina Park, Jamaica nung mezüngbuba asayatsü.

South Africa aser West Indies na January 18 nü nungi tenzük Centurion nung asayatsü aliba ya tetsürtem asaya mezüngbuba iba temelenshi kübok asayaba asütsü.



Serbia nung tennis asayar Novak Djokovic pusemertemi Belgrade, Serbia nung longkak aitiba noksa nung angur. Australia nung COVID-19 vaccination temzüng ozüng sülen manidaktetba atema Novak Djokovic ya Australia sorkari sota lir aser pa indang visa dena cancle sütsüogo.

BILEMDANGANG

"Anogoshiaji mapa tajung inyaksü atema maongka tajung lir."